



Dragi prijatelji i prijateljice,

Osim što nam pružate kontinuiranu podršku, oslonac i prijateljstvo, godinama pratite naše redovne, ali i nove aktivnosti kroz naše postojanje i djelovanje u Bosni i Hercegovini. Zbog toga smo iznimno sretni što vam ovim putem možemo predstaviti projekat na koji smo ponosni, a to je SOS Centar za podršku hraniteljskim porodicama. Krajem 2024. godine smo, u saradnji sa resornim ministarstvima Kantona Sarajevo i Tuzlanskog kantona, uspostavili ove Centre, kako bi se unaprijedio kvalitet brige u oblasti hraniteljstva. Naše vrijedne kolege kroz ovaj program osiguravaju hraniteljskim porodicama stručnu i materijalnu podršku, ali i onu nematerijalnu koja im je često najpotrebnija. Topla ljudska riječ i spremnost da saslušaju nekad može značiti više nego bilo kakva velika gesta.

Iako je program na samom početku svog djelovanja, emotivnih i lijepih ljudskih priča ne manjka. Velikom broju hraniteljskih porodica osigurani su bolji i kvalitetniji uslovi života, opremljeni domovi i ohrabreni snovi. Ipak, priča koja je napunila naše oči suzama i još jednom nam pokazala da među nama žive ljudi čarobnog srca, ali i da je svaki dan u našoj organizaciji prilika da se promijeni nečiji život, je priča o Maku.

Mak, jednomjesečna beba, čiji biološki roditelji nažalost nisu bili spremni preuzeti brigu o njemu, dospio je u tešku situaciju odmah po rođenju, ali srećom u isto vrijeme i priliku za ipak bolji život. Bračni par Eldin i Dajana žive skladnim, porodičnim životom i ovi dobri ljudi već imaju dvoje djece, koje su usvojili. Kako kažu, njihova djeca rođena su u njihovim srcima i zahvalni su životu što imaju priliku biti roditelji. Kada se pojavila prilika da postanu i Makovi hranitelji, odmah su znali da je to prava odluka. Mak sada raste u njihovom domu, a Eldin i Dajana preuzeli su novu ulogu, ulogu hranitelja i ne mogu sakriti svoju sreću što je Mak danas sa njima i što njihov život iz dana u dan dobija sve dublji i važniji smisao. Stigao je tu kao najslađa trešnjica na torti zvanoj život – ponekad je život gorak, ali Maku će u novom domu zasigurno biti slađi!



Zbog zaštite privatnosti,
imena i fotografije djece su
izmijenjena.

Naše kolege, zaposlene u SOS Centru za podršku hraniteljskim porodicama u Sarajevu, odmah su preuzele potrebne korake i osigurale ovoj porodici sve što je potrebno za Makov siguran rast i razvoj. Aktivno su učestvovali u organizaciji ljekarskih pregleda, kupovini hrane i odjeće za bebe, kao i higijenskih potrepština, opremanju doma... Pred marljivim zaposlenicima naših Centara stoji iznimno važan posao, ali ne sumnjamo da će na svaki zadatak odgovoriti predano i maksimalno posvećeno, kako bi svako dijete odrastalo u sigurnom okruženju.

U Bosni i Hercegovini trenutno ne postoji dovoljan broj hraniteljskih porodica koje bi mogle pružiti djeci u potrebi sigurno mjesto za odrastanje. Ukoliko ste baš vi o tome razmišljali i ako se odlučite prijaviti i postati hranitelj – to je jednostavno, a više informacija možete pronaći na sljedećem [linku](#). Sretni smo što možemo sa našim dragim prijateljima kao što ste vi podijeliti lijepe priče i nove aktivnosti na kojima radimo, ali i zauvijek zahvalni za podršku koju nam pružate.

Do neke sljedeće priče srdačno vas pozdravljamo,

Džana Olovčić
SOS Dječija sela u BiH